

攻媿先生文集

十七

攻媿先生文集卷第三十七

四明樓

鑰大防

外制

在外太中大夫以上任宮觀該

恩轉官

龍圖閣學士正奉大夫韓彥直

首尾詞同

勅朕奉 上皇之慈訓承 列聖之丕圖需乃

渙恩覃于海宇矧是文昌之舊屢從閑燕之居

爰錫明緡俾躋命秩具官某才周庶務仕歷

四朝進長地官職論思而最久退安真館奉趨

謁以甚恭方歌求助之詩仍加進律之寵爰陟

文階之等遂冠侍臣之班其務欽承益思猶告

可

煥章閣直學士朝奉大夫謝諤

具官某純誠自守全德兼容聽履而上星辰已

高勇退之節把麾而去江海竟尋嘉遯之風

通奉大夫顯謨閣待制陳峴

矧是瑣闥之舊久從葉館之居爰錫明緡俾躋

命秩具官某天資通敏門地高華入處東臺蚤

儀簪橐之列出臨西蜀遂安香火之闕

中奉大夫敷文閣待制吳益

矧惟次對之舊久遂真祠之游爰錫明緡俾躋
命秩具官某稟資和粹植行端良壯歲逢辰已
列甘泉之侍高懷去國惟求藥館之閑

太中大夫煥章閣待制劉國瑞

矧是論思之舊久從閑燕之居爰錫明緡俾躋
命秩具官某秉心無競持論不阿橫榻宣威徑
上甘泉之列西清寓職遂安藥館之游

太中大夫敷文閣待制賈選

具官某才周世務識照事機憲部持平蚤列甘
泉之侍闕山報政遂安藥館之游

在外太中大夫以上致仕官該 覃

恩轉官

龍圖閣學士通奉大夫張大經

以下

首尾
詞同

勅朕仰奉慈謨嗣膺聖緒肆頒大霈覃及萬邦
當代英才雖賜環而畢至前朝故老乃上印以
言歸顧注想之方深豈渙恩之可後具官某純
明而有執亮直而能容諫大夫之伏蒲朝行甚

肅大常伯之聽履物望愈高挹神虎掛冠之風
寓龍馬負圖之職居然壽考允矣典刑比歌求
助之詩庶有乞言之福爰陟文階之峻用爲晚
節之華其服寵光益介繁祉可

敷文閣直學士正奉大夫汪大猷
具官某性通而自節道廣而能周雍容簪橐之
班凡有謀而必告出入麾符之後乃未老而求
閑辭榮上北闕之章寓職峻西清之舊

正議大夫寶文閣待制沈樞

具官某風猷高邁政術淹通揚歷禁嚴嘗任官
端之重周旋郡寄遂專連帥之雄聯次對之清
班樂辭榮之嘉遯

朝散大夫敷文閣待制李昌圖

具官某才周通變氣稟直方登蜀道之難屢稱
膚使出漢廷之右遂列從臣通次對之清班樂
辭榮之嘉遯

中奉大夫萬鍾直龍圖閣守本官致
仕

勅具官某朝廷用人豈容其無故而去臣子納
祿或遂其知止之高爾以文奮身以才用世外

臨兩郡既治行之有聞內列九卿非官游之不
達方將執筆於左螭之陛乃欲掛冠於神虎之
門畀以河圖之華成而縣上之隱是或一道毋
有遐心可

著作郎李唐卿江東提舉太常丞呂
棐湖北提舉

勅具官某等朕惟一人之聰明不能周知天下
之故分道遣使不惟寄耳目于外臨遣朝士又
得以宣布予之德意志慮於民常平以歛散爲
職括山澤之利事顧不重哉爾唐卿心平而論
篤父于著作之庭爾棐氣勁而言忠丞于禮樂
之地俱以儒學老成見於有用治縣稱最寘彼
周行輟從郎曹將我使指一往大江之左一往
重湖之北各揚乃職朕不汝忘可

知建康府鄭僑吏部尚書

勅金陵爲王者之宅固有藉於保釐吏部有天
官之名尤欲精於流品粵求舊德復領從班具
官某執德不回秉心無競舉明主於三代之上
倡諸儒以六經之文論思不憚於犯顏封駁尤
高於批勅出臨鄉部載守留都肆纂承丕祚之

初乃董正治官之日亟頒召節方欲聽尚書之履聲盡付銓曹豈令書干木之紙尾佇聞猷告其疾爾驅可

太常少卿詹體仁太府卿

勅具官某容臺之禮樂外府之財用其實皆政也後世治出於二而後有流品之分然禮以養人爲本又曰樂以殖財惟知古道者能言之爾好古學而志於用頃由道山冊府出爲常平使者遠護軍儲能聲益昭歸處少列明禮修樂亶惟其長序進卿長上以佐民曹之調度下以梏有司之出內以若之才不勞而辨朕將思所以用汝者焉可

監察御史曾三復太常少卿

勅具官某憲府設屬以六察爲重容臺少列非七寺之比 壽皇厭朝士之數易御史裁廡或二三年而不遷若其察事能審敢言不阿擢居禮樂之司不以爲吝士亦以此競勸朕之用爾蓋此道也爾氣剛而克和才敏而能詳其在周行表表自立報政于輔郡簡僚於南牀助正臺綱閱時最久朕知其有靖共之譽故拔而用之

禮方從宜大饗伊邇引經据古使禮行於上而人孚于下朕於是望汝焉可

李壁祕書省正字

勅具官某惟爾父爾兄並游英俊之躔有臯綬之遺風無歆向之異論能繼厥後爾惟其人自登世科亟寘冊府銜卹萬里素冠三年召收來歸復畀舊物豈惟以是正簡冊望汝史事甚重爾有家傳朕將於汝乎求之可

知樞密院事趙汝愚該 覃恩封贈

曾祖太子太保士慮少保

勅朕祗膺慈訓勉紹丕圖允賴邇臣共濟萬幾之務爰因惠澤特推三世之恩具官某宅慶璇霄聯芳寶牒少而從宦雖官政之莫施孝以冝家諒躬行之無媿後厥餘福流于後昆進參宥府之崇嘗賁儲寮之峻茲疇故典遂陟孤卿用昭寵光以慰冥漠可

曾祖母文安郡夫人龔氏崇國夫

人

勅朕履位云初均福于下有如近輔之重可後曾門之光具封某生于儒家嬪我皇族動謹珩

璜之飾克共蘋藻之儀爰及諸孫進居兩地遂啓封於大國以錫命於小君陰報可知寵光未艾可

祖太子太傅不求少傅

勅圖大宅中方布維新之令建極歛福實均共政之臣爰舉彝章加賁先世具官某履行純固稟資粹和生長承平及見累朝之全盛始終信厚遂臻後葉之繁昌進秩青宮申命黃壤茲以湛恩之布徑躋亞傳之榮尚惟不忘其克祗服可

祖母濟陽郡夫人晁氏濮國夫人

勅惟時近臣翊予初政厥有霈澤光爾前人具封某素稟嫺柔能循法度中饋攸職宜其室家慶源既深有此湯沐載啓濮陽之號益崇石窠之封是爲異恩以詔幽窆可

父太子太師善應少師

勅惟予冲人嗣大歷服無疆維休均暨海宇凡列朝籍皆得以榮其親矧二三大臣顧可後歟具官某孝友實根於天稟躬行無媿於古人爲吾宗盟之表善言善行稱於縉紳卽世之後隱

然不忘是宜其有子也寵及泉壤遂冠六傳茲以周官貳公之秩以告于第且以慰雨露之感英靈不昧其尚寵嘉可

母饒陽郡夫人李氏申國夫人

勅大寶嗣守賴茲臣鄰湛恩普覃燕及禰廟具封某克遵壺範能謹婦儀四德備全協山水之高趣三遷垂教爲廊廟之鉅賢屢錫恩封以昭寵遇乃開申伯之國載徹饒陽之封以寬吹棘之思庸示漏泉之澤可

妻通義郡夫人徐氏安定郡夫人

勅丕緒紹隆方履重熙之運臣工翊贊宜均內助之恩具封某婉孌自將柔嘉可度克相夫子遂爲當代之名卿乃嗇天年不見幾廷之異數亶敷寵渥豈間幽明用疇涇水之封載徹眉山之舊尚惟英爽欽此卹章可

簽書樞密院事羅點初除封贈

曾祖起太子少保

勅延登邇臣翊贊初政維時偉望進參宥府之嚴庸錫明綸以厚曾門之寵具官某持身無玷制行有嚴寡悔寡尤自潔幽人之履以嗣以續

遂開餘慶之源厥聞惟彰其後乃大爰昇青宮之秩用疏黃壤之恩尚惟不亡其克祗服可

曾祖母陳氏臨川郡夫人

勅參宥密之司是謂百僚之表煥顯揚之典宜加三世之榮具封某婦德素充姆儀尤備柏舟自誓知勤苦以成家彤管有光篤義方而教子至孫曾而遂顯信陰報之不誣錫命小君疏封鄉郡以侈漏泉之澤以彰告第之恩可

祖琢太子少傅

勅士有積德在躬弗見於用施及後嗣追榮厥先於百年之後豈人力所能致哉具官某孝友天稟義槩素篤人不間於其昆弟之言深談不二安分知足長者之號著於鄉黨積此慶羨篤生樞臣申命九泉遂登東儲六傅之秩如有知也庶克自慰可

祖母鄧氏新興郡夫人

勅登用大臣所以贊廟謨也錫命之初則必有以寵其先世又所以示優典也具封某勤儉柔淑如古賢婦克相夫子以廣義風為族嫻之所依賴含飴之愛素篤于生前雖不及親見其貴

而湯沐之頒方來未艾榮亦至矣新興名邦用
賁真漢惟爾靈其與享之可

父贈中散大夫朝俊太子少師

勅積厚流光既陟機庭之峻位高寵厚肆崇禰
廟之恩厥有故常式昭渙渥具官某操履純固
性資靖夷共被對床素深同氣之愛指困倒廩
尤高周急之風是鍾令子之賢親見儒科之擢
逮超登於近著嘗屢被於卹章進位宮師疏榮
泉壤庸示教忠之效庶寬追遠之思可

母齊安郡夫人繆氏封通義郡夫

人

勅遴選名儒密贊紫樞之貴推恩賢母式頒鸞
誥之華具封某性稟賢明動循鑒戒從夫協趣
克共蘋澗之儀教子有方首擢桂林之秀承顏
甚樂就養有年受福祉而未央見寵光之狎至
茲易眉山之號用崇石笏之封其服異恩益介
遐壽可

妻贈淑人黃氏永嘉郡夫人

勅進秉事樞實倚朝廷之重載疏湯沐以旌閨
闈之賢具封某稟姿懿柔處已莊靜毓慶儒族

知女則之不踰作配名卿循婦儀而克謹云乎
不淑弗見顯庸茲疇甌海之雄用錫鸞牋之寵
姑從告第少慰悼亡可

妻淑人陳氏封咸安郡夫人

勅同前具封某鍾慶相門流芳女範無違夫子形
鵲巢積累之風宜其家人有鳴鳩均一之德克
謹旨甘之奉居惟法度之循茲開名郡之封用
錫贊書之寵其祗異渥益懋芳猷可

中書舍人彭龜年兼侍講

勅朕自臨帝位首闢經帷詳延舊學之賢不改

潛藩之舊具官某始以德選久從吾游素知朕
意之所安况有詔書之備列不待多訓自應具
知惟孟軻所著七篇之書非戰國以來餘子所
及蓋嘗三復其說間有一得於中若知言養氣
之難存心盡性之妙人無不善聖可踐形正須
反覆屢陳使予通徹無蔽若夫爵祿之制井地
之規凡諸所傳皆我當講食云則食坐云則坐
朕當審尊賢之方義莫不義仁莫不仁爾其務
正君之學可

給事中黃裳禮部尚書

勅朕嗣膺大統首擢舊僚然建安七子之賢先
推徐幹商山四皓之盛最數黃公徑躋八座之
崇庸侈一時之盛具官某學足以充其性辯足
以達其心貫穿經史之言而纏纏可聽論議古
今之變而歷歷如睹自予幼學屢得良師若夫
上皇委任之專潛邸游從之久無間於我未有
如卿規過舉則何止血山之言執正道則不數
邪蒿之說開性天之所蔽知學力之自來幸不
容甘盤遯野之行是宜被伯夷典禮之命孺子
王矣方夕惕以憂勤良言旨哉尤日資於獻納
其祗予訓益勉爾忠可

著作佐郎王容范仲黼並著作郎祕
書郎王奭校書郎蔡幼學並著作
佐郎

勅具官某等學士大夫以道山冊府比之蓬萊
瀛洲之勝而著作之庭又其高選也爾容學博
而文優爾仲黼忠純而意篤旣皆升處其長奭
之遠業幼學之英才又均使爲之佐或以倫魁
而聲稱昭于時或以名門而學問世其家是皆
稱此選者朕篤意人材共興治功公卿將於此

乎取何止以史事而望汝哉可

祕書省正字顏棫祕書郎項安世吳

獵並校書郎

勅具官某等比歲一日給札而得三俊館閣之盛舉也然秀穎之才將於此乎養之以待用若棫之聲名發於上庠獵之才略著於劇縣安世之節槩又士論之所推是三人者不惟老於文學又俱練於世故舉而用之何所不可况年皆自強而艾固無俟乎菁莪之育也茲命棫典中祕書獵與安世為校讎之職姑以序遷朕將有以用汝焉可

文苑文苑卷之三十一

小八

十三

忠公

浙西提刑黃適湖南運判江東運副

傅伯壽浙西提刑

勅具官某等朕分道遣使以寄耳目於外地有遠近職有劇易選任之意則無不均爾適以諒直之姿抗澄清之志使于近畿威望甚聳引疾求退故畀爾以湖外漕計少休其勞爾伯壽以精敏之才在文章之選使于江左職業日修惜其久外故授爾以畿甸臬事引以自近然飛輓讞議二者俱重事也一日不理則必有受其弊

者其各勉旃以稱予選可

知樞密院事陳騃初除封贈

曾祖太子太保敷少保

勅朕嗣守大寶凜乎重器所賴左右大臣輔其不逮乃由政地進陟機庭追榮厥先是有彝典具官某隱德不耀躬行有餘孫子相承代傳清白之訓施及三世遂登廟堂推恩泉壤至于再三是有以致此也茲舉周官孤卿之秩以告于第尚惟歆承嘉命佑爾後人可

曾祖母河內郡夫人成氏滕國夫

人

勅夫人之號古者謂之小君歷觀在昔蓋未有無因而得之者也具封某躬節儉之行有柔嘉之德克相夫子以肥其家陰功所昭至於孫曾而後見湯沐䟽寵蓋嘗歷始興河內之郡今茲封國間於齊楚庶幾冥漠其克自慰可

祖太子太傅策少傅

勅學士大夫必知尊祖非獨禮典之攸尚至於爲世顯人徃徃推迹先世之所自隱德彰著其應不虛具官某出太丘之華胄生赤城之儒族

棲遲衡泌不以利欲貳其心躬行之篤見信鄉黨雖不及施用於世而積厚流光屢被追榮之典茲登亞傅品秩益崇如有知也可以無憾可

祖母博平郡夫人朱氏崇國夫人

勅婦人之爵必從夫子若夫異恩之頒加貴王母非二府大臣則不與此具封某動遵圖史雅習組紉婦道甚飭隱然朱陳之好也含飴之愛素篤雖不及親見其貴而積善之效乃暴白而不可掩疏封一國以爲廟室之光可

父太子太師讜少師

勅陳氏著姓自媯汭之後歷三代建國不絕漢以來多名卿大夫百世相望君子之澤未泯亦可謂盛矣具官某以隱逸遂其性以詩禮訓其子內行之積既有以大其門閭而教忠之效卒爲朝廷之端士存歿雖異哀榮則均夫三孤之長貳公洪化有子如此遂申命於九泉豈惟慰爾子深長之思亦所以示予體克之意可

前母文安郡夫人成氏杞國夫人

母濟陽郡夫人王氏信國夫人

勅延登樞臣所以贊廟謨也錫命之初必有以

寵其先世又所以示恩典也具封某稟姿婉嫵處已儉約有光彤管之訓不媿采蘋之詩是有賢子爲吾近輔副筭六珈屢頒石窀之封矣茲徹沐邑改命于杞伯所都之地王氏云命于廣信之區以勸天下之爲人婦者可

妻魯郡夫人宣氏封魏郡夫人

勅朕初膺丕祚晉用近弼惟東西二府兼以任之夙夜匪懈是可厚其內助之恩乎具封某性資賢明能循法度歸于名士用勤儉以起其家閨閫之政不以累焉使得一意於精白以承休德是足嘉者茲啓大名之郡以詔予寵其尚祇服永綏燕譽可

知樞密院事陳騏該 覃恩轉官

勅朕祇荷 慈謨欽承丕緒萬幾之務每懼於弗堪共政之臣實資於夾輔因霈恩而申命覽遜牘以力辭序進一階僅同百辟具官某忱恂而堅正渾厚而溫恭久處從班以嘉謀而入告自居宥府任大事以不疑比當內禪之初嘗求小恙之助善調庶事動懷永圖執義示公惟知議軍國之利害忘身徇主豈復計官資之崇庠

乃詔攸司俾行故事不已循墻之避遂忘反汗之嫌矧東府彌縫之是兼尤當代觀瞻之所繫姑徇撝謙之志稍行進律之褒噫文武兼資尚深思於並用內外無患當益勉於交修惟肩乃心以翊予治可

參知政事余端禮該 覃恩轉官

勅朕以寡昧之資傳 泰安之祚既登九五之正位允賴二三之大臣盍因覃霈以疏恩終以謙辭而改命具官某崇深而有裕莊肅而能容幼學壯行終始靡渝於一節出藩入從精白不

形於二心比參鴻樞實贊初政俾進居於東府仍兼領於宥廷一日萬幾之繁既調娛而曲當三軍五兵之問又該綜以無遺雖官簿之當升曾身謀之不顧命由中出事則公行何陳義之益高乃抗章而不已姑徇三辭之請僅升一秩之華噫訐謨遠猶乃所望於賢輔高爵厚祿豈有吝於予懷其尚欽承以副隆委可

四川制置使丘密煥章閣學士再任

勅乘乾德以御圖始受四方之籍念坤維之作牧久分一面之權眷威惠之並行豈恩榮之可

後寵加延閣因任帥垣具官某道廣而能周才
高而善下躬履冰霜之操手揮河漢之文握節
擁麾所在著神明之政簪筆持橐周行推仁義
之言頃出鎮於成都實總臨於諸道先聲所暨
遠俗自孚瀘川除暴之餘施賞刑而曲當武興
闕帥之久藉方略以無虞兵民無不歸心茲宥
爲之破膽封陞晏若政績炳然東西六十州敢
違號令幅員數千里燕及羗髻寬朝廷之顧憂
信京師之流福堯章增煥正學士之清班蜀道
借留慰吾民之素望示予隆睠表爾異能德裕
籌邊何止山川之洞見孔明識治或言禮樂之
可興益懋前功以需登用可

朱熹煥章閣待制侍講

勅朕初承大統未暇它圖首闢經幃詳延學士
眷儒宗之在外頒召節以趣歸徑登從班以重
吾道具官某發六經之蘊窮百氏之源其在兩
朝未爲不用至今四海猶謂多竒擢之次對之
班處以邇英之列若程頤之在元祐如尹焞之
於紹興副吾尊德樂義之勤究爾正心誠意之
說豈惟慰滿於士論直將增益於朕躬非不知

政化方行帥垣有賴試望之於馮翊不如寘之本朝召賈傳於長沙自當待以前席慰茲渴想望爾遄驅可

翰林學士李巘寶文閣學士知婺州勅登鰲戶以摛文久資潤色分虎符而出守有賴蕃宣中外雖殊眷倚無間具官某性資淵靜學問該通視八代文章之工欲齊驅於藝苑極三朝詞命之選幾獨步於禁林周旋十年終始一致古事今事問無不知公門私門行皆可迹方進遷於翰長何遽動於歸思寵西清學士之

五地二八集卷第三十

久八

九

夏義

班仍寓宸奎之職為東方諸侯之長更當寶婺之躔是誠岳牧之用人宜有江山之為助徒得君重其為朕行勉著民庸以觀儒效可

檢正應孟明太府卿

勅具官某爾以純一之德惻怛之誠見於牧人御衆之間備著愛民利物之效召由帥閫徧儀宰掾蓋朝列之老成士林之標表也外府上佐大農之調度下拏有司之出內卿士惟月實艱其選舉以命之公議允諧罔津要途自茲始矣

可

右司徐誼中書門下省檢正諸房公
事吏部郎中錢象祖右司刑部郎
中沈作賓檢詳

勅具官某等朕初政是圖惟二三大臣夾輔之
賴樞機至重當先其大者豈可以細故縈之於
是詳擇掾屬以次而遷爾誼深沉而善謀爾象
祖詳審而無滯爾作賓在郎曹有通敏之稱其
爲朕簡節䟽目清東西府之務俾吾大臣惟振
綱挈領以贊予遠猷則爾爲稱職矣可

吏部郎官李沐將作監

勅具官某東都李固好學尋師同業不知爲司
徒邵之子其所成就復爲李公爾以輔臣之子
退然寒生蚤擢甲科仕進甚緩文敏而蔚追企
古作郎潛旣久避遠煩劇處之繕監以遂其志
素尚如此遠業未可量也可

軍器監丞汪梓倉部郎官大理寺丞
周琬刑部郎官

勅具官某等列曹爲郎其選俱重非治郡有聲
績者不與焉國家行之幾三十年弗可改也已
爾梓博涉文學有志事功出守都梁滇以甚飭

爾必明習憲法恪意操守濡須之政田里晏安
况俱以名臣之子嘗在朝列奉最而歸宜登茲
選肆令並命以究爾能積貯者天下之命寬仁
者累聖之規深體至懷各贊而長可

兵部侍郎取秉煥章閣待制知太平

州

勅入而奉上為言語侍從之臣出則殿邦任蕃
宣屏翰之寄士之從宦是為通顯國之用人初
無重輕第於臨遣之間終惜老成之去具官某
天資鯁亮政術精詳自其居下位之時已有澤
斯民之志功利及物既所至而可稱懇惻愛君
凡有猷而必告甫上甘泉之列亟求故里之歸
旋即賜環復令持橐為真武部固有賴於論思
攝事瑣闥尤見推於抗直比力祈於補外亦深
察其由中畀以當塗真是太平之官府寵之次
對仍聯兩禁之清班用昭眷懷增重侯度訪民
編之疾苦諒無假於訓辭控天塹之要衝尚往
圖於方畧勿以在遠而忘獻言可

大宗正丞李大性軍器少監兼權司

封郎官

勅具官某朝士之職優而事簡者無如二監非所以處才者然而銓序人物具有差等不可廢也爾一門競爽刻意記問出而丞邊郡入而造周行心計有餘遇事多辨進貳戎監仍攝郎曹益務靖共以俟選擇可

大理寺丞彭演大宗正丞

勅具官某朕惟國家本支百世繁衍盛大高出近古既擇屬近行尊之賢者以糾合宗盟又選學士大夫以貳其事職雖清簡不以輕畀也以爾經術該綜吏事精明丞于外府于廷尉踐揚既久而後登此蓋亞於三丞之選仕益進矣優游養望其進未央可

大理司直朱致民大理寺丞陳樸大理司直

勅具官某廷尉天下之平而國家設屬為尤備囚徒之聽自昔以吉士臨之奏當之成今又使分董而察焉以爾致民儒學老成久與臬事故俾升而為丞爾樸才具資品皆應近制故以為邦之司直朕嗣服之始專以祖宗家法為務雖罔兼於庶獄懼不獲於一夫各既乃心毋懈

于位可

太府卿詹體仁直龍圖閣知福州

勅具官某朕覽長樂之志知其地大物阜真東南一都會也帥守掄才初政爲急以爾學問該洽性識深明試之劇煩所在辨治入爲九卿嚮於用矣願歸閩部求便其私徑疏晝繡之榮仍畀河圖之直跨州連邑要風氣之不殊並海負山賴威名而爲重倚觀政績以究爾能可

廣西運判張釜直祕閣知廣州

勅具官某朕臨御萬國一視同仁嶺海之遠待猶畿甸矧番禺重鎮實控南服謀帥之際其何可輕以爾紹興舊弼之孫以家學登世科潤飾吏事所在稱辦湖湘明斂散之宜廣右謹將輸之要就移五筦之長以當一面之雄寓直道山以爲爾寵爾其填撫遠氓招徠海賈斥貪殘獎廉介以稱予倚任之意是惟休哉可

知建寧府陳居仁知鎮江府

勅由詞掖以偃藩久騰善最分輔邦而易鎮用獎賢勞宜錫明緡以昭寵數具官某風猷凝粹心地平夷識者歎其遠到之資望而知爲大度

之士文華緯國久從鳳沼以代言豈弟宜民屢
以虎符而出守恩威並用寬猛適時不惟人樂
其中和所至歲爲之登熟眷茲京口控彼江津
城郭增雄有山川之映發兵民雜處無牒訴之
浩繁屬早賊之爲菑賴賢侯之勤撫毋庸臨遣
亟望遄驅坐理南徐其首修於荒政時登北固
尚有賴於良籌惟服訓辭嗣圖褒表可

瀘州安溪寨蕃官王鑒男天麟承襲

補承信郎

勅某國家填撫萬邦燕及方外惟爾父祖恭順
相傳爾之承襲請命于朝武爵之頒益務忠謹
可

江西運判趙鞏直顯謨閣知隆興府

勅具官某國家選侯甚重謀帥尤艱旣懲數易
之繁重戒迎新之費就移使節俾正帥垣爾受
才甚高得譽最早以文學之彥爲慈惠之師其
在合肥極論淮錢之弊迨移夔子載言蜀戍之
詳主漕計以宣勞總邦條而攝事撫綏凋瘵賑
救凶菑因江西頌韋侯之言念河內借寇君之
意徑令洗印以遂開藩侯訖外庸成爾歸志可

沈清臣江東提舉

勅具官某士有自重其身而輕視軒冕嘉遯於世而獨樂山林是雖出於一槩較之浮競者相去遠矣此有國者之所當與也爾以古學爲任不計時之用捨頃游館學從予潛藩儼然自持古之畏友也茲予纂紹念爾退閑起以江左之節用慰家食之久其尚少安以俟恩渥可

中書舍人蔡幼學兼侍講

以下二首嘉定元年以吏部尚

書兼翰苑偶西掖無兼貞用故事行詞併附于此

勅春秋天子之事具存一國之書筆削聖人之

三

五

六

五

徐經

公實爲萬世之法朕久勤講貫期廣見聞茲擇名儒共論斯道具官某深知經旨素有師承未冠而擅倫魁士皆取則旣壯而登臚仕人以爲遲近升禁路之華庸代王言之重予欲旁通於六藝豈容弗措於一辭所以至日具而不遑庶幾學古訓而有獲懲惡勸善其力究於微言考古驗今將益明於大體可

蔡幼學講詩終篇轉官

勅朕踐祚十五載尤先講貫之勤誦詩三百篇端賴緝熙之益談經旣畢第賞可稽具官某蚤

冠時髦寔爲朝望踐揚已久旣昭著於外庸獻
納于今喜時陳於讜論謹鳳掖代言之職當金
華卒業之辰序進文階以酬儒效其罄格心之
學用爲報上之忠可

攻媿先生文集卷第三十七

攻媿先生文集卷第四十一

四明樓 鑰大防

內制

明堂禮畢告謝天慶觀青詞

伏以祗祀合宮爰卜季秋之吉靈承上帝聿臻
熙事之成丕擁神休實繫道蔭乃鳩寂士俾演
真科用伸告謝之誠益茂方來之祉更祈洪造
普芘函生

滿散朱表

伏以肇祀總章獲全盛典葳儀真宇用荅靈休
荷雲馭之來臨肅瓊章而具列受釐云始介福
無疆

明堂禮畢告謝五嶽四瀆祝文

伏以祗奉 慈謨親行大饗多儀既備景貺孔
昭實惟山川之靈陰相馨香之薦尚歆誠悃滋
介純禧

賜趙彥逾再上劄子辭免端明殿學
士并執政恩數不允詔

勅具悉卿以起部大常伯領袖從班主耳忘身
與陪國論金陵吾之北門固以謀帥爲重文明

之峻職政府之異數所以寵卿之行今欲辭二者而之鎮顧豈若留卿以自近乎朕慮之甚審久而後發不應至此乃復反汗無以多言爲也

賜新除安德崇信軍節度使伯圭辭免不允詔

勅具悉朕肇裡重屋懼弗克堪贊予盛儀賴我宗老首頒祭澤無加於達尊者乃因舊鎮益以漢東之大國備三公之典策兼兩鎮之節旄先正以爲異數非如卿者其孰能當之何用撝謙以避斯寵

賜汝州防禦使知閣門事韓侂冑辭免轉兩官不允詔

勅具悉卿傳家累世歷事三朝旣忠力之備宣豈褒榮之可後力請真祠之佚却而復來俾登留務之華咸以爲允亟其承命毋用牢辭

明堂禮畢祭謝五嶽四海四瀆祝文
伏以肇祀合宮告成熙事惟二儀祖宗之禮皆已備修凡五嶽河海之神悉均望祭雖靈祠之尚遠顧虔報之敢稽

明堂禮畢奏謝 諸陵表文

伏以嗣歷云初奉先爲大適三歲當郊之際祇
薦總章惟列聖在天之靈俯垂陰佑雖潔齋之
粗備懼誠悃之未孚高厚顧歆神明來格旣沆
成於熙事敢恭布於深衷遙望 陵宮不勝感
涕

瑞慶節建康府茅山崇禧觀啓建祝

壽道場青詞

伏以良月方中誕辰斯屆惟華陽之洞府素集
真仙瞻句曲之名山用祈景貺伏望三峯交會
衆聖溥臨即崇禧之宮俯歆淨供授長生之籙
加惠眇躬上焉介壽於 重親下以均釐於四
海

滿散朱表

伏以騰嵩嶽萬歲之呼首臨誕日望金陵三茅
之勝肅演真科肆闡蘭場旣歆非薦願垂道蔭
彌介天祺嘉與民編同躋壽域

賜新除少傅周必大辭免不允詔

勅具悉卿 三朝元老身佩安危退處東山直
欲棄置人間事顧豈以爵秩爲心哉朕初臨御
注想不忘下詔乞言䟽恩進律亦可以見朕意

矣覃霽之頒無遠弗届安有達尊如卿而可但已保傳一間不必固辭遜章甚力非朕所望

賜趙汝愚再辭免提舉編修國朝會

要不允詔

勅具悉卿進專國秉總領衆職無所不統固無待於兼官也國家以史事爲重故必擇其尤重者屬之上相疊畀三組旣已再命而又欲辭其一何耶會要之書故實所萃諸儒載筆坐總宏摹兼人之才豈復憚此其祇成渙以訖奏篇

安穆 安恭皇后改謚告 太廟祝

文

伏以仰惟 烈祖將祔太宮易別廟之舊稱從成孝之尊謚先期以告英鑒其臨

大行至尊壽皇聖帝靈座祝文

伏以集百官於南郊首定稱天之謚奉 二后於太室改從祔廟之名將舉盛儀敢伸昭告

賜提舉淮南東路常平茶鹽公事陳

損之獎諭勅書

以常平司見在米麥及收糶物斛分撥八州軍賑糶共二

十萬石

勅某云云朕嗣服之始旱潦相仍宵旰興懷務

行實惠首形詔告所望部使者推廣上恩初不以重賞爲禪也卿使淮堧蓋嘗久興水利茲又能發其餘蓄上不仰給於大農下有以平八郡之糴邊民被惠已廣而又將爲後日之儲有臣如此實寬顧憂載覽奏章良深嘉歎

賜伯圭再辭免兩鎮節度使不允批

荅

省表具之朕惠于宗公務隆於體貌相予肆祀可後於恩褒位已極於人臣官無加於師尹兼授齋壇之鉞陪多井賦之租是曰彝章未爲異數儀刑所繫以爲泰乎俯偃之恭再斯可矣

口宣

有勅卿位冠三公望高九族茲相合宮之祀用頒雙節之華其服恩榮毋爲謙避

賜吏部尚書鄭僑辭免兼實錄院修撰不允詔

勅具悉 高宗中興臨御三紀一代之史簡冊挈繁設官累年汗青無日朕旣命大臣爲之典領思得鴻儒耆德爲諸儒倡卿自陪都還朝表儀從班論譔之重非卿誰屬矧惟舊物不待疇

咨趣上奏篇毋勞謙避

瑞慶節滿散道場賜乳香口宣

三省

有勅應鍾協呂彌月在辰嘉爾臣工共祝金僊
之佑用放芬馥以爲寶所之華

樞密院

有勅元英在候初度甫臨有嘉宥府之賢同致
封人之祝載分寶篆用賁蘭場

殿前司

有勅良月斯臨誕辰方屆乃率周廬之衛共伸

二十

五

六

金震

嵩嶽之呼爰錫名薰用光法會

馬軍司

有勅律紀孟冬慶逢初度得驩心於騎士祝眉
壽於朕躬爰帥舊章式放寶炷

步軍司

有勅祚纂紹熙節標瑞慶嘉爾熊羆之士首開
龍象之筵賁以芬薌助其齋潔

瑞慶節萬壽觀滿散道場青詞

伏以躬履慶圖方席延洪之運節臨良月初逢
震夙之期爰即殊庭肅陳淨供惟虛皇之來格

俾誠意之潛通仰冀重闈同綏萬壽

滿散朱表

伏以蘭場展采爲初度而有祈寶炬交輝睹靈光之下燭奉盛以告已事而竣願加佑於沖人俾獲綏於繁祉

瑞慶節太一宮設醮青詞

伏以誕彌厥月式標瑞慶之名立愛自親先上壽康之祝啓竹宮之邃宇演瓊笈之真科仰冀高靈俯歆淨供俾遂承顏之樂益綿過曆之期

滿散朱表

伏以祥開初度肅羽士以陳儀壽祝重親望龍樓而致禱真游來下景貺其臻願與聖人之年坐膺天下之養

賜吏部侍郎彭龜年辭免兼侍讀詔

勅具悉朕開邇英之閣瞻無逸之圖上慕唐虞近法祖宗正有賴於啓沃之助卿以舊學之臣勸講多益升之進讀亦惟序遷朕方汲汲於學卿欲濟濟相遜固經帷之美事也然雖有德齒之尊不曰朝廷莫如爵乎其毋固辭徒稽朕命

賜伯圭再辭免兩鎮節度使不允仍

斷來章批荅

省表具之朕尊寵帝師惟恐不至優崇宗老尚
竊慊然故因大饗之成曲示異恩之渥載加少
府之節復登上將之壇城南天下稀舊臨樂土
漢東國爲大併領名藩式慰具瞻益綏多祉旣
無反汗之理奚事循墻之恭

口宣

有勅卿德齒俱尊名位皆備欲後三卿之寵遂
疏兼郡之恩何必固辭亟祇成渙

右丞相趙汝愚加食邑實封制

門下朕祇膺丕緒肇祀合宮賴天地之靈儼百
神而顧享嚴 祖宗之配綿萬世以承休惟時
大臣贊我縟禮肆頒祭澤敷告朝倫具官某寬
博而崇深裕和而肅括學造聖賢之蘊才兼文
武之優有經濟四海之志而行之以忠有酬酢
萬變之智而決之以果擢由樞筦進秉國鈞是
爲社稷之元勳非止衣冠之盛事處心無競休
休多容物之仁守道不阿蹇蹇盡匪躬之節予
所毗倚國其庶幾頃卜仲辛恭修大饗上稽皇

祐之故典近遵慈極之宏摹致精三日之齋虔
奉九筵之制惟辟公之顯相厥有賢勞顧熙事
之備成敢云專鄉增多采邑併衍真畬以隆巖
石之瞻以壯維城之勢於戲戴貂蟬而展采因
宰路之所同被袞繡以侍祠實宗盟之未有惟
親賢之並用於邦國以增光其服渙恩益圖治
績可

賜告口宣

有勅卿爲時上相贊我盛儀是宜與邑之多用
見疇庸之渥其祇成命毋事謙辭

聖朝文苑卷第四十一

九

唐書

季秋淫雨震電罪已責躬 御筆

朕仰承付託嗣守邦圖夙夜靡遑惕有祇慄迺
季秋之月陰氣爲沴雨淫不止繼之震電變不
虛致朕實懼焉罪已責躬其曷敢後可令學士
院疾速降詔布告中外

詔十月八日

勅門下朕臨御以來三閱月矣迺者降水爲災
畿甸尤甚悉意賑撫未知攸濟而又陰氣爲沴
天作淫雨繼之震電信宿猶未已也時惟季秋
實巳冬孟茲豈其時耶變不虛致朕甚懼焉豈

朕之德薄不足以承祖宗之休烈抑眇躬有過朝政或闕而致然歟雲漢之詩遇裁而懼終篇惟及靡神不舉靡愛斯牲等語蓋言如此而天降之災罪必在我側身脩行之誠見於言外此朕之所當勉也朕欲應天以實而方執壽皇之喪避殿撤樂皆無以自見惟是罪己責躬其曷敢後布告中外使知朕恐懼脩省之意

賜王藺再辭免知潭州不允不得再有陳請詔

勅具悉惟有周之盛時以分陝爲重任故煩舊弼往鎮邊陲升祕殿之隆名易昭潭之巨屏輿言允協憂顧滋寬胡爲再辭至勤三命粵漢詔流行之旣久諒楚人僊望之已深倚聞叱馭之行毋執循墻之避

賜新除四川安撫制置使趙彥逾辭免不允詔

勅具悉蜀道險遠人所憚入一之謂甚其可再乎然朝廷爲官擇人不免於推轂以遣忠臣忘身徇國豈難於叱馭而行昔趙抃以匹馬入蜀爲政簡易及其再命神宗諭之曰近歲無自

政府復往者卿能爲我行乎拊曰陛下有言即法也顧豈有例哉今朕知卿清節著於蜀遂用熙寧故事卿能體拊之忠其得辭行乎

士歆加食邑實封制

門下朕嚴九筵之禮是曰肇禋逆三神之釐若蒙昭荅餽惠所暨臣鄰斯均矧惟屬籍之尊可後恩光之渥集廷紳而誕告示詔綍之匪私具官某德性寬洪風猷端粹重珪疊組生長富貴之中盪節駢旄雍容間燕之久惟夙夜之匪懈仰春秋之益高實長周家之宗盟是爲劉氏之祭酒茲崇宗祀與贊上儀冠班列於三孤聳儀刑於九族乃加井賦仍侈圭腴以表耆英以隆孝治於戲祭有十倫之義莫如同姓之先備者百順之名益介遐齡之永顧如壽俊奚假訓辭可

賜告口宣

有勅卿位冠孤卿望高宗老旣奉合宮之祀爰加采邑之封雖曰彛章是爲新渥

郭師禹加食邑實封制

門下朕祇事總章荷神祇之來格廣施惠術普

中外以惟均顧予元舅之親嘗與羣工之相肆
加異數明告周行具官某迪德忱恂飭躬謙靖
祖后實爲於同氣 壽皇尤篤於優恩淑旂綏
章蚤授齋壇之鉞篆車希冕近升棘位之班疏
三吳公社之封廩萬壽祠庭之祿能屏膏梁之
習自忘圭組之崇比卜季秋親祠重屋茂對三
神之祉宜先四姓之賢用衍爰田載加真食於
戲兢兢業業以事上帝朕敢懷專鄉之私洞洞
屬屬而存小心爾尚介方來之寵益昭吉履永
保脩名可

賜告口宣

有勅禮畢九筵恩均百辟賜予伯舅之胙均茲
宣室之釐與邑旣多頒綸可後

賀金國生辰使副梁揔戴勳到闕傳
宣撫問并賜銀合茶藥口宣

有勅卿等遠聘殊鄰旋歸近境念舟車之勞勤
頒茗劑之珍芳仍命行人往將予意

金國吊祭使人赴闕口宣

盱眙軍傳宣撫問賜御筵

有勅卿肅持使指來慰國哀眷入境之云初豈

肆筵之可後往宣予意以勞爾勤

鎮江府賜銀合茶藥

有勅卿等肅擁使華遠將慰禮經鐵甕山川之險錫寶奩茗劑之珍宜體眷懷用安旅次

鎮江府賜御筵

有勅卿等來趨素幄行次丹陽雖深銜恤之悲不廢示慈之宴是將厚意式寵行人

平江府賜御筵

有勅卿等遠從燕驛近及吳門深嘉唁問之勤宜備賓筵之渥其承異眷益進來程

賜新知鄂州吳琚辭免不允詔

勅具悉卿奮自戚閑被服儒雅雖齋壇授鉞棘位通班人終以用未盡其才爲言矧襄漢上游嘗騰善最武昌重地宜分顧憂何必固辭亟其祇命

周必大加食邑實封制

門下朕嗣守邦圖肇修宗祀父天母地祭旣重於合祛尊祖敬宗禮尤嚴於並侑予一人越紼以行事爾多士奉璋而侍祠眷舊弼以興思顧慶條之可後誕敷渙號敷告昕廷具官某

簡重而閎深直方而膚敏典誥上規於姚姒詞
章遠軋於漢周弼亮 兩朝未究經綸之蘊鎮
安四海有懷康濟之功偃藩南國之雄均逸東
山之勝比以霈恩之渥升之亞傳之崇注想不
忘乞言方切屬伸大報爰啓合宮載謀載惟
聖父嘗頒於先甲我將我享季秋乃卜於仲辛
熙事旣成蕃釐來介申衍多田之賦仍加真食
之封於戲明堂王者之堂方荷神休之荅二老
天下之老宜先祭澤之施尚迪遠猷永綏殊寵
可

天堯二八卷六第廿四

一四

徐珪

賜告口宣

有勅卿嘗位冢司均休真館屬總章之竣事賦
多邑以示恩其即欽承以祗眷渥

賜趙彥逾再辭免新除端明殿學士
中大夫四川安撫制置使兼知成
都府不允不得再有陳請詔

勅具悉蜀道天下之絕險也然以爲難則難於
上青天以爲易則易於履平地是在人爾卿嘗
總軍餉調度五十餘州公廉明恕蜀人誦之茲
庸命以制閩之寄蜀父老聞卿之來必有不待

教而孚者矧視儀政地位望愈隆尤足以示朕
不忘遠之意謀帥之重蓋無以易卿者矣

賜趙汝愚辭免大禮加食邑實封不

允詔

勅具悉朕祇事總章懼弗克堪卿以端揆實專
使領天地並况神明顧歆熙事備成顯相之力
也賦以多邑具有故實既免告廷之禮何事循
墻之避

金國吊祭使人赴闕口宣

赤岸賜酒果

二十三

五苑三集卷第四十一

十五

徐滋

有勅卿等遠將慰問來屆近郊先之旨酒之頒
增以嘉穀之錫少安次舍用息勤勞

賜御筵

有勅卿等握節載馳越疆來吊將展國喪之禮
宜先郊勞之儀其體眷私少休區薄

賜被褥鈔鑼

有勅卿等遠致奠儀久勞客路爰厚寢衣之賜
仍分盥器之珍跋履之餘撫存加渥

密賜大銀器

有勅使華既接吊禮斯勤宴已備於饗殮器仍

加於銀鏤是爲異渥少慰賢勞

賜生餼

有勅卿等少安賓館旣畢吊儀按聘禮以受饗命廩人而致餼諒均徒御咸體眷懷

賜內中酒果

有勅卿等禮謹吊喪退將即次頒酒殺於內府示恩寵於來賓意則有餘物惟俱稱

朝見訖歸驛賜御筵

有勅卿等慰此國哀見于喪次爰暫休於燕館用初秩於賓筵首示殊私嗣加好賜

就驛特賜衣服金帶銀器衣著

有勅卿等吊喪自遠率禮無違器分山溢之珍衣有身章之寵雖云多品未盡至懷

賜內中酒果

有勅卿等肅將使節來唁喪幃嘉有客之多儀出尚方之珍品甘芳俱厚寵眷彌加

在驛特賜射弓酒果

有勅卿等旣肅哀儀難修賓射雖輟主皮之藝仍加設醴之勤殺核俱頒情文尤厚

特賜射弓御筵

有勅卿等交鄰有道序賓以賢屬當變禮之時
仍飭初筵之賜穿楊何取折俎惟優

特賜射弓例物

有勅卿等慰予國恤厚乃賓儀雖觀射之未遑
顧匪頒之可後悉從常禮以表眷懷

朝辭訖歸驛賜酒果

有勅卿等吊哀事畢贈賄禮成將遄車馬之歸
載厚壺邊之錫其承嘉貺復啓長途

賜御筵

有勅卿等既趨素幄遂別彤墀禮不替於權輿
恩更加於觴豆尚安旅次徐屆歸程

回吊祭國書

皇祖上僊嘗馳赴閭沖人嗣位方服通喪荷信
使之遠來辱吊儀之加厚益堅盟好彌切感悰
哀疚既深敷陳難究

回賀登寶位國書

祇奉慈謨勉承丕祚比飭行人之告茲勤信使
之來儀物有加書函尤備既荷禮文之厚益欣
盟好之堅爰謹報章用陳謝悃

報謝登寶位國書

祖武是繩孝思方切勤使華之遠暨知盟好之
彌隆品物具陳情文俱稱比已騰於報犢爰再
飭於行人仍致彛儀用將謝悃

賀慶元元年正旦國書

三陽收慶方夙戒於行人萬里交歡復遠勤於
信使惠以函書之厚加之篚幣之豐爰飭報章
備宣謝臆惟益堅於世好冀均介於春祺

奉上 孝宗皇帝謚冊寶 成穆

成恭皇后改謚冊寶奏告天地社

稷十神太一祝文

伏以 壽皇即遠方定於尊稱 祖后俱從當
更於舊謚將嚴寶冊敢告神祇

天慶觀報恩光孝觀青詞

伏以仰惟 烈祖將祔太宮集百官于圓丘既
舉稱天之禮遷 二后於別廟併陳更謚之儀
祇率舊章恭修淨供敢伸昭告仰冀洪休

賜新除刑部侍郎梁揔辭免不允詔

勅具悉卿少習憲章歷官棘寺爲郎爲卿皆以
此選正以明練吏事心計有餘遂持使節遂董
軍餉擢貳民曹俱號稱職若今秋官虛負捨卿

尚誰屬耶明允篤誠若自道然萬里使還徑俾
爲真僉曰汝諧何辭之有

賜吳琚再辭免不允不得再有陳請

詔

勅具悉朕立賢無方惟才是用亦不必曰右賢
而左戚也爾嘗主漕計總軍餉出帥襄陽皆有
治狀可紀而強仕之餘使之奉祠燕處可乎鄂
渚兵民雜居號稱難治正倚才刃勿復謙辭

賜王蘭辭免覃恩轉一官不允詔

勅具悉朕嗣位云初覃霈四方小大之臣罔不
均被卿以元樞舊德出鎮雄藩序進一階亦惟
彝典忽披遜牘殊拂眷懷其服恩光毋留朕命
師夔加食邑實封制

門下朕寅紹丕圖虔修大饗親惟伯父既有助
於多儀神介蕃釐詎敢云於專鄉亶敷命綍用
告昕廷具官某履行粹和稟資端靖生長神明
之胄源流詩禮之傳出分顧憂見民庸之甚茂
入趨班綴奉朝謁以尤恭建六燾以承家視三
孤而命秩屬講肇禋之禮適當越紼之行攝事
太宮降登有度陪祠重屋顯相無違庸推祭澤

之優可後宗盟之懿爰加井賦併衍畚租茲謂
恩褒式昭名數於戲奉犧牲粢盛而告聿嚴布
政之宮拓山川土田之封益示展親之義其祇
異渥以對靈娛可

賜告口宣

吳瓌吳琚同

有勅禮成重屋賚及萬方宜首及於懿親用申
加於多邑載放明命其服殊恩

吳瓌加食邑實封制

門下朕穆卜季秋躬修大祀靈祇授職幸熙事
之備成多士在廷賴懿親之顯相宜放惠術敷

十三

吳瓌加食邑實封制

二一

徐璠

告羣工具官某謹畏自將純和無玷聯四姓小
侯之貴承 三朝外戚之恩入侍中宸屬橐鞬
而甚肅進班上閤飭冠佩以尤嚴頃建齋壇退
安琳宇旋視孤卿之秩併開公社之封逮歲禮
於九筵實均釐於萬國乃增采邑仍衍圭腴以
彰寵數之優以表肅雝之助於戲蒐上儀於陽
館豈惟黍稷之馨錫蕃祉於后家可後朕膺之
賜尚綏吉履以服彝章可

吳琚加食邑實封制

門下合宮肇祀實祇奉於慈謨宣室受釐爰大

頒於霈澤惟時懿戚夙著賢稱庸舉徽章式孚
渙號具官某美由世濟才應時須登簪筆持橐
之聯惟知避寵更握節擁麾之選不專爲恩比
崇建於齋旄旋寢加於孤棘逮茲大報贊我上
儀禮旣備於八階胙惟優於四姓俾增多賦仍
衍真腴於戲文德以講明堂幸神祇之顧饗賀
慶以親異姓宜福履之均霑雖曰邦彛尚承惠
渥可

蕭鷓巴加食邑實封制

門下奠圭瓚以薦誠旣虔修於宗祀執豆籩而

三

王始文集卷第四十一

二

蔣榮祖

在刻宜咸被於靈娛眷我虎臣董茲羽衛厥有
渙恩之錫式彰顯相之勞具官某智略雄深性
資沉鷲望雲就日夙肩面內之誠建旄設旄馴
致總戎之拜奉真祠而均佚視左棘以疏榮乃
因霈澤之行增畀爰田之賦申加真食用侈神
休於戲承異眷於 三朝蓋屢覲彌文之盛敷
大賚於四海顧可無寵數之優益綏令圖以保
終吉可

郭杲加食邑實封制

門下朕頃用盛秋虔修宗祀奉犧牲以薦備陳

重屋之儀賴爪牙之良肅領千廬之衛旣云竣
事可後均釐我有明綸告于列位具官某生資
沉毅世濟忠勤氣稟山西期遠追於起翦書傳
圯上自有合於孫吳久專將闡之雄入侍殿巖
之邃屬祇孝饗務罄齋誠奉璋惟多士之賢執
戟有元戎之重肆疇采邑仍啓侯封以介靈休
以彰異渥於戲茅簷蒿柱朕方躬大禮之嚴玉
節瑀戈爾尚體中權之寄益思忠報以荅殊知
可

賜告口宣 蕭鷓巴同

文是五之三六六天古力四一

二二二

莊宗祖

有勅禮嚴重屋澤及羣工錫多邑於巖除啓新

封於侯甸

蕭改眷我勁
臣疇茲多賦

其祇明命益勵忠猷

太上皇帝本命萬壽觀設醮青詞

伏以離德繼明方極慈闈之養日官告曆載逢
辰次之周啓純福之殊庭演虛皇之妙旨霓旌
來下寶炬交輝願申箕翼之期長謹晨昏之奉
滿散朱表

伏以慈宸燕處高蹈於希夷藥館陳儀用祈於
壽嘏純誠上達靈鑒具孚冀福祿之來崇致庭
闈之同慶

侍講陳傅良朱熹宣赴經筵供職曲

謝宣荅詞

有制朕務明政體首闢經帷嘉舊學之來歸喜耆儒之同集其思忠告以副疇咨

初講畢案前致詞降殿曲謝

陳傅良

有制首頒召命渴想忠猷聳聞講貫之詳恍若從游之舊克諧朕志益啓乃心

朱熹

有制久聞高誼傾佇嘉猷來侍邇英之游講明大學之道庶幾于治深慰予懷

孝宗皇帝謚號下日改換銘旌奏告

祝文

伏以烈祖在天南郊定謚既遵節惠之典載飭神明之旌仰惟威靈俯鑒誠恪

孝宗皇帝攢宮神圍除去鋪屋窠木

等奏告 昭慈聖獻皇后 永祐

永思陵祝文

伏以 皇祖上僊期方臨於七月稽山庀役地實近於 諸陵暫撤微廬稍開宰木懼有驚於

神御敢先叩於威靈仰冀洪慈俯加陰佑

賜周必大再辭免少傅不允不得再

有陳請詔

勅具悉朕勉紹丕圖方修初政首推霈澤溥及羣工惟予元老之賢宜陟孤卿之秩偃息而藩魏室何必在廷寅亮而命周官是爲進律載披來奏殊嗝眷懷卑於公尊於卿亦惟均耳一而俯再而偃何以多爲茲繫具瞻毋庸固避

賜梁搃辭免奉使回程特轉一官不

允詔

勅具悉卿輟自從班遠使鄰國服勞已甚成禮而還序進文階厥有舊典往祗渙命何事謙辭賜知明州何澹辭免曾任藩邸講官

轉一官不允詔

勅具悉卿頃以儒英授經於朕逮予嗣服眷注不忘求之近比當進兩秩舊僚遜避俯徇其請在卿又何辭焉宜遂欽承毋至于再

金國吊祭人使回程口宣

賜龍鳳茶并金鍍銀合

有勅遠修言問茲遂旋歸茶分北苑之珍器備

南金之飾是爲異渥用慰遐征

赤岸賜酒果

有勅卿等返旆云初出郊于邁加六壺六籩之饋致三辭三揖之勤式慰爾歸用將予意

賜御筵

有勅卿等成禮云歸啓途未遠意方勤於郊送恩宜視於賓初旣厚眷私益堅信睦

平江府賜御筵

有勅卿等吊儀旣備使事言旋行已次於蘇臺恩仍頒於鑄燕禮文加厚客路具宜

汧路賜使副冬至節綰

有勅使且北歸日方南至載念脩途之役俾加厚幣之將其服恩榮尚寬旅思

讀祭文官

有勅卿遠陪膚使歸遇新陽爰頒束帛之温以助重裘之燠益昭眷渥庸慰賢勞

三節人從

有勅長至維時遠歸在道言念禦寒之具特加實篚之珍賚賜有差恩私無異

鎮江府賜御筵

有勅卿等來修慰禮既畢使儀望北薊以還轅
至南徐而憩節庸加燕衍其悉眷私

盱眙軍賜御筵

有勅卿等來成使禮歸次邊疆更加宴豆之勤
不替權輿之舊其承眷禮遂戒征途

攻媿先生文集卷第四十一



